

ACADEMIA PRO INTERLINGUA

Volapük — München 1887 — Paris 1887-1892 — Petrograd 1893-1898
New York 1898-1908 — Torino 1909 — *Interlingua*

Præsidente: G. PEANO, Prof. in Universitate de Torino,
Cavoretto - Torino.

Thesaurario: Ing. G. CANESI, Via Costigliole 1, Torino 5.

HISTORIA DE ACADEMIA.

Latino es lingua internationale ab tempore de imperio Romano, per toto medio ævo, et in scientia usque ultimo seculo. Mathematicos Leibniz (1646-1716), Newton (1643-1727), Eulero (1707-1783), Gauss (1777-1855) scribe quasi semper in latino.

Hodie quasi omni auctore scribe in proprio lingua nationale, id es, in plure lingua neolatino, in plure germanico, in plure slavo et in nipponico. Tale multitudo de linguis in labores de interesse comune ad toto humanitate constitue magno obstaculo ad progressu.

Plure propone de reveni ad latino scholastico. Experientia de omni die proba quod octo anno de studio, quale es factu in nostro scholas, non suffice pro posside latino.

Alios propone uno lingua nationale, quale franco aut anglo. Nos pote lege uno lingua extraneo, post tempore non longo, sed pro scribe in isto lingua cum regulas de grammatica, es necessario plure et plure anno. Omni lingua naturale habe difficultates in grammatica, vocabulario, phonetica. Lingua nationale es vexillo de natione independente, et nemo renuntia ad suo nationalitate pro alio.

Linguis artificiale es multo plus simplice, et obtine aliquo successu.

Schleyer (1831-1912), parcho in Konstanz, in anno 1879 publica Vp. = Volapük, in anglo « wordlspeech », interlingua. Illo es composito ex vocabulos tracto ex latino, anglo, et plure alio lingua, in orthographia speciale, et cum grammatica de mirabile re-

gularitate. Pauco ora suffice pro lege et scribe in Vp, cum auxilio de suo vocabulario.

Kerkhoffs, docto professore de linguas in Paris, in anno 1886, per libros et periodico diffunde Vp in Francia et in toto mundo, et propone simplificationes. Plure alio propone modificationes plus grave, aut novo systema.

Fautores de lingua internationale conveni numero ad congressu de München in Bavaria, 6-9 agosto 1887, et funda « Academia pro Interlingua ». Schleyer es præsidente, Kerkhoffs es directore. Interlinguistas, in congressu de Paris, anno 1889, in tempore de expositione universale, approba statuto.

Propaganda de Vp de Schleyer perveni ad apogæo in 1890, cum 25 periodico in Europa, Asia et America. Postea cede ad formas plus simplice et perfecto.

In illo tempore, plure interlinguista demonstra existentia de vocabulario internationale derivato ab latino.

Academia in 14 decembre 1892 nomina directore ing. Rosenberger de Petrograd. In serie de circulares, Academia collige 4500 vocabulo internationale, que compara cum linguas A(nglo), D(eutsch) F(rançais), H(ispano), I(taliano), R(usso) et L(atino), que suffice pro construe lingua.

In 1898 societate nomina suo directore rev. Holmes de New York, et socios publica vocabularios internationale.

Prof. Peano in 1903 publica plure scripto de mathematica in « latino sine flexione », et in 23 decembre 1908 es nominato directore de Academia.

In 1910 Academia modifica suo statuto, et redde ingressu libero ad fautores de omni forma de lingua internationale. Singulo collaboratore adopta quod vide bono in alios; formas de interlingua es proximo. Scriptores de Italia, Francia, Hispania, Anglia, Germania, Russia, Asia, America, intellige inter se, ergo scribe in idem lingua. Illos non es antagonista, sed collaboratores concorde pro lingua internationale.

Ex patiente studio de interlinguistas resulta evidente quod linguas de Europa habe numero vocabulo commune. Vocabulario internationale es in quasi totalitate latino, græco incluso, et es documento de historia de nostro civilizatione. Grammatica pote es

PM8401
.A3
CP 27 Apr. 23

reducto ad pauco aut nihil. Plure anno es necessario pro stude grammatica de uno lingua nationale: pauco hora suffice pro Volapük. Omni interlingua moderno es intelligibile ad primo viso aut quasi.

STATUTO DE ACADEMIA.

Extracto.

1. Academia es societate inter fautores de lingua internationale
2. Omni homo, que mitte ad thesaurario Fr. 10 per anno, es socio de Academia, et habe jure de voto tres mense post inscriptione.
3. Socios nomina Directione de Academia, et 15 membro de Consilio. Directione administra Academia. Consilio judica divergentias inter directione et socios.
4. Majoritate de 3/4 de socios pote modifica Statuto.

REGULAS PRO INTERLINGUA.

In 1910, Academia, per votatione, approba etiam regulas pro Interlingua. Regulas es solo consilio que majoritate aut unanimitate de socios da ad interlinguistas, es semper in discussione, et es obligatorio pro nullo. Qui non seque regulas de Academia, es peccato de expone regulas de suo lingua.

1. - **Vocabulario.** Interlingua adopta omni vocabulo commune ad A(nglo), D(eutsch), F(rançais), H(ispano), I(taliano), P(ortuguez), R(usso).

Et omni vocabulo latino in vocabulario etymologico anglo.

2. - **Orthographia.** Omni vocabulo internationale, que existe in latino, habe forma de thema latino.

3. - **Grammatica.** Suffixo -s indica plurale.

VOCABULARIO.

« Vocabulario Commune », editione de 1909, dono de Auctore ad omni socio de Academia, contine tabula de 1700 vocabulo commune ad A. D. F. H. I. P. R. Ex illos, 1511 es græco-latino, 35 es arabo, cetero de vario origine.

Exemplo: græco-latino *geometria* es in I.H.P. *geometria*, F. *géo-métrie*, A. *geometry*, D. *Geometrie*, R. transcripto *geometria*.

In modo simile, es A.D.F.H.I.P.R. vocabulos *arithmetica*, *mathematica*, *physica*, *mechanica*, *grammatica*, *poesia*, *rhetorica*, latino *jurisprudentia*, *medicina*, latino novo ex arabo *algebra*, etc. Non solo nomine de scientias, sed toto nomenclatura scientifico es internationale. Per exemplo, es A.D.F.H.I.P.R. vocabulos græco: *catheo*, *hypotenusa*, *parallelo*, *centro*, *diametro*, *cylindro*, *sphaera*, et latino *figura*, *perpendicularare*, *normale*, *sectione*, etc.

Vocabularios etymologico decompone vocabulos in elementos. Ex vocabulos LADFHIPR *solare*, *solstitio*, seque latino *sole*. Ex *annales* seque *anno*; ex *diurnale*, *meridiano* nos trahe *die*, etc.

Circa 450 vocabulo de usu commune deriva ex Indo-Europæo. Exemplo: Latino *mater*, Græco *meter*, A. *mother*, D. *mutter*, R. *mati*, *materi*, Sanscrito *matar*.

Socios Pinth 1912, Basso 1913, Peano 1915, Canesi 1921, publica vocabularios de interlingua, semper plus amplo et præciso.

Resulta quod vocabulario internationale coincide circa cum vocabulario latino scripto in vocabulario etymologico de anglo. Latino et anglo es duo extremo in tempore et spatio de lingua internationale. Qui stude vocabulario internationale, stude etymologia de proprio lingua. Omni lingua habe numeroso synonymo. Cultores de scientia præfer vocabulos internationale. Ergo libros de scientia es multo plus facile ad extraneo quam libros de litteratura.

Schleyer in Vp consilia usu de vocabulos internationale, sed illos non es scripto in vocabularios de Vp. Academia in 1895 adopta principio de internationalitate in vocabulario. Hodie quasi omni interlinguista adopta vocabulario internationale. Consilio de Academia significa: Socio que adopta vocabulo non internationale, quando existe vocabulo anglo-latino cum identico valore, es precatu de adde rationes.

ORTHOGRAPHIA.

Academia consilia orthographia conforme ad latino, pro vocabulos internationale existente in latino.

Exemplo: *ad*, *in*, *et*, *non*, *ibi*, *semper*, *heri*, *quatuor*, *nihil*.

Si vocabulo habe in latino plure forma, per causa de declinatione et conjugatione, nos adopta thema. Thema resulta ex vocabulo, suppresso suffixo de flexione.

Ex accusativos latino: *rosam pedem sensum diem*, resulta quod *-m* es suffixo de accusativo. Illo suppresso, nos habe thema: *rosa pede sensu die*, quod es ablativo latino. Ergo nos assume ablativo quale thema de nomine. Nos perveni ad idem resultatu si in accusativos plurale: *rosas annos pedes sensus dies*, nos supprime finale *-s* de plurale.

Ex infinitivos latino: *amare habere scribere audire*, resulta quod *-re* es suffixo de infinitivo. Illo suppresso, resulta thema: *ama habe scribe audi*, quod es imperativo. Ergo nos assume imperativo quale thema de verbo.

Thema nominativo: *rosa, cornu, mas, pus, theoremata*.

Thema in *-i*: *navi* aut *nave*, *omni* (ablativo) aut *omne* (nominativo neutro).

Vocabulos que in latino es irregulare es facto regulare: *que ex quem, imita, mede, nasce, ori, vol, pote*.

Vocabularios de Pinth, Basso, Peano, Canesi, contine omni thema latino internationale, in ordine alphabetico.

Lectore que ignora latino, et que non habe uno vocabulario de interlingua, pote interpreta vocabulo dubio cum auxilio de vocabulario latino ad usu de schola, libro que existe in omni bibliotheca, cum versione in omni lingua.

Vocabulario scholastico contine in generale infinitivo de verbo: *amo amas amavi amatum amare*, unde thema *ama*. Illo da, de nomine, nominativo et genitivo. Thema resulta per regula sequente, scripto in omni grammatica latino:

Ad finales de genitivo *-ae -i -is -us -ei*
responde finale de thema *-a -o -e -u -e*.

Volapük non habe regulas pro orthographia. Academia in 1895 muta *æ* in *e*, *ph* in *f*, supprime vocale finale, etc. In 1812 Academia consilia orthographia de thema latino. Socio, que non seque regula de Academia, es precatu de expone regulas de suo systema.

Existe vocabulos internationale non latino classico. Plure es græco-latino moderno, quale *logarithmo*, *oxygenio*, *telegrapho*, *aeroplano*, *interlinguista*. Alios es latino scientifico: *algebra*, *cifra*, *cofea*, *thea*.

« Vocabulario commune 1909 », pag. 13, cita sub forma originale F. *buffet*, I. *allegro*, H. *albino*, A. *club*, etc.

GRAMMATICA.

Grammatica, tormento de pueritia, es quasi semper inutile pro intelligentia. Viatore in natione extraneo, stude pauco vocabulo de isto natione, et sine grammatica construe phrasi, que publico intellige.

Si in italiano: « Io scrivo. Tu leggi. Noi abbiamo una lingua e due orecchie. La lingua internazionale ieri era un'utopia, domani sarà la verità » nos scribe omni vocabulo sub forma citato in vocabulario, resulta « italiano senza grammatica »:

« Io scrivere. Tu leggere. Noi avere uno lingua e due orecchia. Lingua internazionale ieri essere utopia, domani essere verità », lingua tam claro pro lectore que cognosce italiano, quam italiano grammaticale.

Si cum auxilio de vocabulario italiano-français, nos verte omni vocabulo de « italiano senza grammatica », resulta « français sans grammaire »:

« Je écrire. Tu lire. Nous avoir un langue et deux oreille. Langue international hier être utopie, demain être vérité ».

Anglo sine grammatica: « I write. You read. We have a tongue and two ear(s) ». Illo es quasi anglo vero.

Lingua sine grammatica es tam claro quam lingua cum grammatica, plus logico, et de interpretatione immediato cum auxilio de solo vocabulario. Si in casu de necessitate nos pote loque sine et contra grammatica, non es decente de scribe uno libro in lingua nationale sine grammatica.

Aliquo suffixo grammaticale pote es utile.

Grammatica de Volapük, N. 96, dice: « Signo de plurale es littera -s, sicut in anglo, franco, hispano, latino, sanscrito, etc. ». Per ex. latino *matres*, H. P. *madres*, A. *mothers*, græco *meteres*, sanscrito *mataras*, et es indo-europæo. Academia conserva isto suffixo internationale.

Qui adopta elemento -s cum valore logico de *plure*, *omni*, etc. et non per concordantia grammaticale, scribe in lingua sine grammatica.

Plure interlinguista hodie adopta conjugatione de forma *ama amaba amato amare*. Grammatica es in pauco linea. Socio de Academia es peccato de expone regulas de grammatica que adopta.

Vocabulario de Canesi confine studio super quæstiones de grammatica.

HISTORIA DE INTERLINGUA.

Interlingua es scientia pro scribe in modo plus claro quam in omni lingua nationale, et habe longo historia, descripto in libro:

Couturat et Leau, *Histoire de la langue universelle*, Paris 1902, paginas 576.

Idem, *Les nouvelles langues internationales*; Paris 1907, pag. 112.

Isto libro es hodie antiquato. Libro recente et optimo es;

Guérard, *A short history of the international language movement*, London 1922, paginas 268.

Publicationes de API., « Academia pro interlingua », contine numeroso documento, studio theorico, applicationes in practica, de omni forma de interlingua. Me reproduce citationes plus interessante.

S. Augustino, *De civitate Dei*, anno 426:

« Linguarum diversitas alienat hominem ab homine, et propter solam linguarum diversitatem, nihil prodest ad consociandos homines tanta similitudo naturæ ».

Versione: « Diversitate de linguas aliena homine ab homine, et solo per causa de diversitate de linguas, similitudine de natura non servi ad consocia homines ».

Descartes in 1629 scribe in orthographia de illo tempore: « Ce ne sera pas merueille que les esprits vulgaires apprennent en moins de six heures à composer dans cette langue avec l'aide du dictionnaire... Je tiens que cette langue est possible, et qu'on peut trouver la science de qui elle dépend, par le moyen de laquelle les paysans pourroient mieux juger de la vérité des choses, que ne font maintenant les philosophes ».

Versione: « Tunc non es mirabile que spiritu vulgare disce in minus de sex hora ad compone in ce lingua cum auxilio de dictionario. Me puta que ce lingua es possibile, et que nos pote inveni scientia de que lingua depende, et per que rustico pote melius iudica de veritate de res, que ne fac hodie philosophos ».

Leibniz plure vice stude isto problema, sed suo manuscripto « De grammatica rationali » es publicato solo in 1903. Illo dice:

« Grammatica rationalis tradenta est, ad latinam (linguam) applicata.

« Nominum casus semper eliminari possunt, substitutis in eorum locum particulis..., ut patet ex linguis in quibus nullæ sunt nominum inflexiones.

« Discrimen inter substantivum et adiectivum negligi potest.

« Videtur pluralis inutilis in lingua rationali.

« (In grammatica rationali) careri etiam potest abstractis nominibus ».

Versione: « Nos applica grammatica rationale ad latino. Nos semper pote elimina casus de nomine, si nos substitue in loco de illos, particulas « de, ad... » ut pate ex lingua sine flexione de nomine. Adjectivo es identico ad substantivo. Plurale non es necessario. Non pote elimina abstractos ».

J. Grimm, illustre philologo, in 1860 publica « Programma pro formatione de uno lingua universale », et dice: « Pro magno publico es utile de expone utilitate extraordinario que resulta pro toto genere humano per formatione de uno lingua universale. Nullo lingua nationale pote es adoptato pro isto scopo. Hoc pro publico, nam pro studiosos tale affirmatione es evidente, et es inutile de perde tempore in suo demonstratione. Latino pote servi pro forma radices primordiale; nam es lingua mortuo, parente ad lingua indo-europæo, et es noto ad sapientes de omni natione ».

Vp., abbreviatione de **Volapük**, habe 1400 vocabulo radicale et 300 affixo grammaticale, que exprime omni flexione et derivatione.

Vp. *sol*, in es latino, *dog* = cane, *if* = si, es anglo; *ibo* = nam, es russo.

Finale *-a -e -i* indica genitivo, dativo, accusativo latino; ergo « *sol sol-a sol-e* » vale « *sol, de sol, ad sol* ».

Nullo vocabulo radicale pote incipe aut termina in forma de suffixo grammaticale; ergo latino « domo, fama, fine » es Vp. « *dom, fam, fin* ». Anglo *wordl* = mundo, et *speech* = lingua, es transformato, in *vol* et *pük*; ergo *vol-a-pük* = lingua de mundo.

Vp. indica plurale per suffixo internationale *-s*. Pronomines habe forma artificiale *ob* = me, *ol* = te, unde plurale *obs* = nos, *ols* = vos. Vp. « *fug-ob, fug-ol, fug-obs* » vale « me fuge, te fuge, nos fuge ». Tempore de verbo es indicato per augmento; Vp. « *stud, e-stud, o-stud* » vale « stude, stude in præterito, stude in futuro ».

Exemplo de Vp: « *o fat ob-a-s, kel bin-ol in sül* », versione litterale: « o pater ego-genitivo-plurale, qui es-tu in cælo », id es « pater noster qui es in cælo ».

In 1889 existe 283 societate pro Vp. diffuso in toto mundo, professores diplomato es ultra 1600; manuales de Vp. es in numero de 316, de que 182 es publicato in solo anno 1888; in isto anno es publicato 25 periodico in Vp. de que quatuor contemporaneo in Italia. Tertio congressu habe loco in Paris, anno 1889. Postea propaganda de Vp. decresce rapido, et es substituto per forma plus recente.

« **Lingvo internacia** » de D.ro Esperanto, pseudonymo de D.r Zamenhof, publicato in 1887, habe 921 vocabulo tracto ex linguas naturale, et in parte artificiale. Editione del 1905 consta ex 2629 vocabulo. Vocabulos naturale es in Esp. minus deformato quam in Vp.

Exemplo: « *Patr-o ni-a kiu est-as en la chiel-o* », versione litterale: « pater-substantivo nos-adjectivo qui es præsentate in articulo cælo-substantivo ».

Esperanto habe hodie plure activo adhærente, et vocabularios moderno contine numeroso vocabulo internationale, circa duplo de illo de 1905.

J. Lott, in Wien, in anno 1888 incipe collectione de vocabulos internationale, quale *vino, novo*, etc., aut que habe derivatos in omni lingua: *sol* in anglo *solar*, *anno* in *annals*, etc. Et in 1889 publica « un lingue international pro le cultivat nations de tot mund, Grammatic, dialogos, letters et vocabular ». Exemplo:

« Mi annuncia Vos, che me occupa profund le mundolingue. Ist universal lingue ne esse un arbitrar invention, ma ele se funda su le latin et le modern lingues, ergo le studie del mundolingue esse recommandabil ».

Versione non es plus necessario. Resulta interlingua naturale, apto subito ad communicatione. Plure judica isto lingua quale franco deformato; in realitate mundolingue de Lott resulta ex vocabulos internationale, cum grammatica ultra simplicite.

Liptay, medico in Chile, perveni in illo tempore ad idem resultatu de interlingua naturale, intelligibile post pauco minuta de studio; et obtine laude ab celebre glottologo Max Müller.

Vide *The Science of language*, a. 1899, tome 2, pag. 67.

D. Rosa, prof. de zoologia in Torino, in 1890 scribe articulos in Nov-latin. « Le nov-latin non requirer pro le sui adoption aliq congress. Omnes poter scriber statim ist lingua. Sic facient ils vol valide cooperar ad le universal adoption de ist international lingua et simul ils vol poter star legé ab un mult major numer de doctes quam si ils haber scribe in quilibet alter lingua ».

Plure lectore judica isto lingua latino macaronico. Frate Fologno, 1491-1544, da isto nomine ad lingua, de que ecce exemplo:

« Vado per hunc boschum solus chiamando Zaninam

Ut chiamat vitulum vacca smarrita suum ».

Latino macaronico es intelligibile solo ad lectore que cognosce latino et italiano, et es opposito ad interlingua, intelligibile ad lectore que cognosce aut latino, aut uno lingua moderno.

Academia in 1893 declara impossibile modificatione graduale de Vp, et collige vocabulos internationale, pro construe lingua.

Exemplo de lingua de Academia in 1895:

« Publikasion de labors sientik in ist lingu es multe preferabl ka publikasion in kelkun lingu nasionik: no es necesik tradukar tal artikles in otr lingus, kause omnihom komprend origin skribed per vo aut ».

Interlingua de illo tempore es naturale, intelligibile subito, cum grammatica simplice, et orthographia regulare, sed artificiale. Exemplo de lingua in 1902:

« Libri e broshuri sientifik publised in ist idiom potes esar lekted per omnihom in original: traduksion no plu es nesar, ili avero sirkul multe plu grand de lektatori ».

Orthographia artificiale produce variantes quale resulta ex comparatione de exemplos 1895, 1902 et magis cum sequente de Rosenberger in 1912, que de suo idioma dice « es multe convenabl pro relationi international. Il es facile apprensibil pro omnihom de cultur european,... ».

Vp. non habe regula generale pro orthographia, habe tot regula quot vocabulo, plure mille. Academia in 1895 fixa regulas generale que muta in 1902. Modificatione de orthographia redde de valore commerciale nullo publicationes præcedente. Academia, per majoritate de socios, vota regulas pro lingua, sed minoritate et publico non obædi.

In tempore de expositione universale de Paris a. 1900, es constituto « Delegatione pro adoptione de lingua auxiliare internationale ». Secretario et anima de toto labore es prof. Couturat, philosopho de multo valore, mortuo in 3-VIII-1914. Numeroso professore et 288 societate scientifico et commerciale adhære ad Commissione, et atesta quod problema urge. Delegatione propone problema ad Associatione internationale de Academies, que nomina relatore prof. Schuchardt, celebre glottologo. Relatione de 1904 affirma importantia de problema et suo solubilitate. (Almanach de l'Académie impériale des sciences de Vienne, pour 1904).

Isto Commissione conveni in Paris de 15 ad 24 octobre 1907; præsentate professores de universitate: Baudouin de Petersbourg, Boirac de Dijon, Förster de Berlin, Jespersen de Kiøbenhavn, Ostwald de Leipzig, Peano de Torino. Parte de commissarios es favorabile ad Esperanto, plus noto; parte ad lingua de Academia de 1902, plus facilè et regulare. Parte de commissarios es in favore de solutione intermedio, et publica libros sub nomine Ido. (API. 1909 pag. 37).

Academia, post 1909, in suo periodico et in periodicos de socios Basso, Hartl, Meysmans, Moore, in Italia, Austria, Belgio, Anglia, es expositione continuo de studio theórico et applicatione in practica de omni forma de interlingua. Etiam linguas a priori, constructo super classificatione de ideas, linguas in cifra, linguas secreto, linguas ideographico quale antiquo ægyptio et moderno sinense, habe interesse.

Socios Michaux, Hartl, Peano, Pinth, Ferranti, Basso, Møeser, Bond, et alios, mitte proprio publicationes ad omni alio socio.

Bello europæo interrompe labores de Academia ab 1915 ad 1921. In ultimo anno, socios Pinth, Hartl, Miller, Panebianco, Banachiewicz, Canesi, Møeser, Provenzal, Peano, Foster, Michaux, Satta, Vanghetti, Barral, Linzbach, Meazzini, Lavagnini, Semprini, Santucci, Ciamberlini, etc. mitte suo publicationes ad socios.

Socio De Wahl publica periodico Kosmoglott in Esthonia.

Socio Lavagnini publica Eclési, toto scripto in interlingua.

« British Association for the Advancement of Science » publica studio super interlingua (API. 1921, N. 3). Societate de Nationes publica longo relatione super isto problema (API. 1922, N. 4).

« Latino sine flexione » es lingua sine grammatica et sine vocabulario proprio, es lingua naturale claro et præciso, quale formula de algebra, et apto ad usu immediato. Plure libro de mathematica es scripto in tale lingua. Periodicos: Revista de Mathematica in Torino 1903, Circolo matematico di Palermo 1906, Mathesis de Gand 1914, Periodico di matematica in Livorno 1903 et 1914, Mathesis de Pavia 1914, Enseignement mathématique de Genève 1916, Rassegna di matematica de Roma 1921 et 1922, Bollettino di matematica de Firenze 1923, Wiadomosci matematyczne de Warsawa 1922, etc. publica articulos in latino sine flexione.

Et in tale lingua es publicato circulares de Observatorio astronomico de Cracovia.

Pro scribe in interlingua intelligibile sine studio, es necessario de cognosce vocabulario internationale, id es, anglo-latino. Vocabulario optimo es:

CANESI, *Vocabulario interlingua italiano inglese, e italiano interlingua*, Torino, Paravia ed. 1921.

Illo contine 10.000 vocabulo de usu commune, scripto in triplice orthographia latino-italiano-anglo, quod proba internationalitate de vocabulo. Es labore toto scientifico, et suo valore dura æterno, contine nullo elemento artificiale et ephemero de Vp. et similes.

CONCLUSIONE.

Pro successo de lingua internationale es utile quod omni scriptore, in publicationes de interesse internationale, adopta forma de interlingua que illo præfer id es, latino scholastico, aut interlingua artificiale aut uno ex numero typis de interlingua naturale. Si lectores intellige illo, suo solutione es bono.

G. PEANO.

ACADEMIA PRO INTERLINGUA.

Quota de associatione ad Academia, Fr. 10 per anno. Socio que mitte uno publicatione ad omni alio socio non debe quota.

Socios recipe:

Circulares de Academia, que contine nomine et habitatione de socios, et tabula de publicationes novo super omni forma de lingua internationale.

Kosmoglott, organ del Societé Kosmoglott, e de Academia pro Interlingua. Director E. De Wahl, Nikitinstrad 10, Reval, Estonia.

G. PEANO, **Vocabulario commune ad linguas de Europa**. Torino, 1908.

G. PEANO, **100 exemplo de interlingua**, 1913.

J. B. PINTH, **Deutsch-Interlingua Vœrterbuch**, Linz, 1912.

J. B. PINTH, **Grammatica de Interlingua**, Luxemburg, 1915.

J. B. PINTH, **Deutsch-neulateinisches Wœrterbuch**, Luxemburg, 1917.

A. HARTL, **Interlingua, Manuale ad usu de omne natione**, Linz, 1922.

WILF. MOESER, **Interlingua in forma de Semilatin**, Linz, 1921.

P. SATTA, **Calendario perpetuo**, Torino, 1922.

D. r G. VANGHETTI, **Quaestione de lingua auxiliario internationale in Italia**.

Ex « Riforma Medica », Napoli, 1922.

Clavi practico ad Interlingua, *Revista Eklexi*, Casella postale 56, Roma.

A. MICHAUX, **Romanal, langue auxiliaire anglo-latine**, Boulogne sur-mer, 1922, pag. 38.

R. PANEBIANCO, **Lege de Haiüy et lege de symmetria**, 1922.

J. BARRAL, **La langue fédérale de la Société des nations**, Nice 1923.

W. BEATTY, **Qosmiani, The new international language**, Washington 1922.

Dott. L. SANTUCCI, **Applicatione de Interlingua ad Unione postale universale**, *Rivista delle Comunicazioni*, Roma 1922.

Et plure alio publicatione, dono de socios.

PUBLICATIONES.

Academia pro Interlingua, Discussiones, anno 1909, N. 1-7 - anno 1911, N. 1-5 - anno 1912, N. 1-7 - anno 1913, N. 1-3.

Circulares anno 1921, N. 1-3 - anno 1922 N. 1-4.

Collectione completo Fr. 30 in auro.

G. PEANO, **Vocabulario commune ad Latino - Italiano - Français - English - Deutsch**, Editione II, anno 1915, Fr. 8 in auro. Auctore dona isto libro ad omni socio que inscribe 5 socio novo.

G. CANESI, **Vocabulario Interlingua Italiano-Inglese e Italiano-Interlingua**. Ed. Paravia, Torino, 1921, L. 10.

Auctore dona isto libro ad omni socio que inscribe tres socio novo.

100 charta postalé de Academia, Lire 7.

G. PEANO, **Formulario mathematico**, Fratres Bocca editores, Torino, 1908, Fr. 20.

G. PAGLIERO, **Applicationes de Calculo infinitesimale**, ed. Paravia, 1907, Fr. 8.



Library of Congress
Washington D.C.
(U. S. America)

PROF. G. PEANO
CAVORETTO - TORINO